

Lëtzebuerg, den 10te November 2022

Communiqué

D'Piraten hunn haut an der Chamber eng Gesetzesproposé deposéiert, an där et dorëms geet, fir negativ Emissiounstechnologien - Stéchwuert *Carbon Capture* - massiv auszebauen. D'Propose huet zum Zil fir Lëtzebuerg an d'ganz Welt méi schnell zur Klimaneutralitéit hin ze beweegen.

An de leschte Joren hu verschidden Etüden erausfonnt, dass d'Reduktioun vun den CO₂-Emissiounen eleng net méi duer geet, fir eist Klimazil vu maximal 1,5 Grad Äerderwärmung z'erreechen. Parallel zur Reduktioun vun den Zäregaser müssen also och Ustrengungen ënnerholl ginn, fir de bestoende CO₂, deen elo schonn an der Atmosphär ass, eraus ze kréien. Mir schwätzen heibäi vum *Carbon Capture* oder negativen Emissiounstechnologien.

Beim Carbon Capture geet et dorëm, fir den CO₂ aus der Loft eraus zefilteren an an anere Forme fest ze setzen, wou en dann net méi zur Äerderwärmung bäidréit. Da kann ënner verschiddene Forme sinn : a Steeschichten oder a Baumaterialie wéi dem Bëtong. Et existéiert och d'Méiglechkeet fir d'Hierstellung vu sougenannten e-Fuels. Dës Dreifstoffler sinn op mannst CO₂-neutral an eegnen sech, fir den Undeel vu fossillen Dreifstoffler kuerz- a méttelfristeg nach ee Mol ze reduzéieren.

D'Gesetzesproposé vun de Piraten wëll d'Investissementer an negativ Emissiounstechnologien an d'Luucht driewen. Negativ Emissiounstechnologien sollten esou schnell wéi méiglech op grousser Skala asazbereet sinn, fir de Carbon Capture am groussen Stil weltwäit anzeféieren.

Mir proposéieren dofir een Aspeisetariff, änlech wéi e mam leschte Stroumgesetz agefouert gouf, fir d'Subventioun vu Projeten, déi a negativ Emissiounstechnologien investéieren. Dës Subventiounsprogramm soll Lëtzebuerg zu engem Virreider am Beräich maachen a vill Projeten heihinner lacken. Zousätzlech zum PNEC soll dës Moosnam Lëtzebuerg nach méi schnell zur Klimaneutralitéit bréngen.

Fir d'Finanzéierung vum Projet proposéieren d'Piraten, fir de Klimafong ze notzen, wou aktuell nach vill Suen ongenotzt leien an deen dofir geschaf gouf, fir ee Beitrag zur Klimakris ze leeschten.

